

Sex Tog

Text: Tom Lackner

1. A jeda Mensch – sogt ma – hod a biss'l an Schdoiz
A Hackla – haaßt's a – waa aus an aunda'n Hoiz
A schtählana Bizeps, massig und zaach
A knoihoate Faust und im Hirn dafia waach

Ea hack'lt sex Tog, und wos hod a davon?
A buglades Kreiz und an schwindlich'ng Lohn
I hauad jo gean ollas hie, wiaklich woa
Oba i g'hea hoit da Fiama med Haut und med Hoa
2. Seit wos i auf da Wöhd bin, moch i do den Tschoch
Wia mei Voda und da Großvoda im söb'm Loch
Und so wia r i des siech, wea r i a do schdea'm
Und mei Bua wiad nocha daunn mein' Oaweitsplotz ea'm

Sex Tog in da Woch'ng, und wos hod a davon?
A buglades Kreiz und an schwindlich'ng Lohn
I hauad jo gean ollas hie, wiaklich woa
Oba i g'hea hoit da Fiama med Haut und med Hoa
3. Bei mia dahaam hod oiwöe nua da Pracka regiat
Und dea hod a dafia g'suagt, dass a Buasch aus mia wiad
I hob zwoa ka Büüdung, oba Händ' zum Dawia'ng
Waunn Di de Rechte vaföht, wiad Di de Linke scho kria'ng

I hack'l sex Tog fia r an schwindlich'ng Lohn
Oisa loss mi in Ruah und sog kan foisch'n Ton
Mei zweita Naum' is „Wick'l“, bitte meak da des guat
Und schau ned so deppat, sunst dasaufst in Dein' Bluat
4. I tua, wos i kaunn, und i kaunn, wos i tua
Fia de Bude, oba leida is des no ned g'nua
Se wünsch'n ma Glick, und se druck'ng ma 'd Haund
Und valed'ng daunn des Weak in a büllicha's Laund

Do hack'lst dreiß'g Joah, und wos host' daunn davon?
A buglades Kreiz und fuffzehn Joah zur Pension
I nahmad jo gean ollas, doch wos's wiegt, jo, des hot's
De Wöhd is jetz' a Doaf, und darin hob i kan Plotz